

草木典第六十六卷

藻部彙考 水豆兒附

釋名

藻 詩經

蒼 爾雅

牛藻 爾雅

藻 爾雅

海藻 爾雅

水藻 綱目

馬藻 拾遺

聚藻 唐本

水蘊 綱目

牛尾蘊 俗名

鯽草 俗名

落首 本經

海蘊 爾雅注

馬尾藻 拾遺


菹草 農政全書

海菜 綱目

藻圖



水豆兒圖



詩經 召南采蘋

于以采蘋于彼行潦

傳藻聚藻也

箋古者婦人先嫁三月祖廟未毀教於公宮祖廟既毀教於宗

室教以婦德婦言婦容婦功教成之祭牲用魚芼用蘋藻所以成婦順也此祭女所出祖也法度

莫大於四教是又祭以成之故舉以言焉蘋之言賓也藻之言澡也婦人之行尚柔順自潔清故

取名以爲戒

疏

左傳曰蘋蘩蕒藻之采蘩聚也故言藻聚藻陸璣云藻水草也生水底有二種其

一種葉如雞蘇莖大如箸長四五尺其一種莖大如釵股葉如蓬蒿謂之聚藻然則藻聚生故謂

之聚藻也

朱註

藻聚藻也生水底莖如釵股葉如蓬蒿

大

陸氏曰藻生水底有二種一葉似雞蘇莖

大如箸長四五尺一莖如釵股葉似蓬蒿謂之聚藻二者皆可食鹽熟揆去腥氣米麪糲蒸爲茹

佳美饑荒可充食

爾雅

釋草

荇

音牛藻

注

似藻葉大江東呼爲馬藻

疏

荇一名牛藻江東呼馬藻藻之葉大者也詩召南云

于以采藻左傳云蘋蘩蕒藻之菜以此草好聚生故言蕒藻蕒訓聚也毛傳云藻聚藻也陸璣云

藻水草也生水底有二種其一種葉如雞蘇莖大如箸長四五尺其一種莖大如釵股葉如蓬蒿謂之聚藻又云扶風人謂之藻聚爲發聲也此二藻皆可食煮熟揆去腥氣米麪糝蒸爲茹嘉美揚州饑荒可以當穀食也

藻

音藻注

藥草也一名海蘿如亂髮生海中本草云

疏

藻又名海藻郭云藥草也一名海蘿如亂

髮生海中本草云者案本草一名落首一名藻陶註云生海島上黑色如亂髮而大少許葉大都似藻葉

綸似綸組似組東海有之

註

綸今有秩嗇夫所帶糾青絲綸組綬也海中草生彩理有象之者因

以名云

疏

綸是糾青絲繩也組綬也東海有草文理似之卽名綸草組草

淮南子

墜形訓

海閭生屈龍屈龍生容華容華生莖葉生萍藻萍藻生浮草凡浮生不根莖者生於萍藻海閭浮草之先也屈龍游龍容華芙蓉草花葉流也無根水中草

毛詩陸疏廣要 召南

于以采藻 藻水草也生水底有二種其一種葉如雞蘇莖大如箸長四五尺其一種莖大如釵股

葉如蓬蒿謂之聚藻扶風人謂之藻聚爲發聲也此二藻皆可食煮熟揆去腥氣米麪糲蒸爲茹

嘉美揚州饑荒可以當穀食也饑時蒸而食之 荈爾雅云牛藻郭云似藻葉大江東呼爲馬

藻邢云以此草好聚生故言蕒藻鄭云水藻之類而葉差大生水底博雅云麥菜藻也風俗通云

象東井形刻作荷 埤雅云藻水草之有文者出乎水下而不能出水之上其字从澡言自潔如澡

也又云藻萍類似槐葉而連生生道旁淺水中與萍雜至秋則紫俗謂之馬藻亦呼紫藻故曰于

以采藻于彼行潦而傳云聚藻也爾雅翼藻生水底橫陳于水若自澡濯然流水之中隨波衍漾

莖葉條暢尤爲可喜故采藻于行潦也有二種其一種葉如雞蘇莖大如箸長五六尺其一種莖

大如釵股葉如蓬蒿謂之聚藻橫被水下有自然之文故古者象服有藻火之屬藻取又畫于稅

以爲飾亦以厭火山節藻稅雖取其文亦以厭火今屋上覆檫謂之藻井亦曰綺井又曰覆海又曰囂頂 今鳧鴈屬亦樂于藻故曰鳧藻楚

曰鳧鴈皆唼夫梁藻是也 按陸氏云藻出乎水下而不能出水之上羅氏亦云橫被水下則

藻非浮者了然矣或因韓氏云浮者爲藻誤刻藻遂謂藻亦出乎水上謬甚埤雅引呂覽云菜之

美者崐崙之蘋藻又引淮南子云容華生藁薑生萍藻萍藻生浮草遂疑蘋卽所謂藻又云非蒲藻之藻又云萍藻之藻浮蒲藻之藻沈總惑于浮沈之說遂誤認蘋藻爲一物耳詩攷作于以采藻

段成式酉陽雜俎 廣動植

水網藻漢武昆明池中有水網藻枝橫側水上長八九尺有似網目鳧鴨入此草中皆不得出因名之

陸佃埤雅 藻

藻水草之有文者出乎水下而不能出水之上其字从澡言自絜如澡也書曰藻火粉米藻取其清火取其明也周官希冕四章自藻而下其章不足道也故謂之希冕希冕言其數也元冕二章自黼而下其數不足道也故謂之元冕元冕言其色也先儒以爲希冕三章元冕一章非是也孔子曰黼衣黻裳者不如藻非不能食也服使然也蓋元冕繪黼於衣繡黻於裳大祭則王服以齊故曰不如藻也中祭而下則服元端然則禮曰齊之元也以幽陰思也元冕亦爾非特元端而已禮曰元冕齊

戒詩曰又何予之元袞及黼黼元冕也以袞舉上以黼舉下蓋言之法也由此觀之元冕兩章則希冕四章明矣蓋子男之服毳冕五章則人君所服盡于此矣人君所服盡于毳冕則希冕而下臣服也故禮自毳冕而上章數皆以奇自希冕而下章數皆以偶奇陽也偶陰也孔子曰管仲饅簋而朱紘山節而藻梲賢大夫也而難爲上也說者以爲藻取其文蓋藻非特爲取其文亦以禳火今屋上覆檁謂之藻并取象于此亦曰綺井又謂之覆海亦或謂之罍頂風俗通曰殿堂宮室象東井形刻作荷菱荷菱水草也所以厭火與此同義詩曰魚在在藻有頌其首王在在鎬豈樂飲酒魚在在藻有莘其尾王在在鎬飲酒樂豈蓋魚性食藻王者微至淵泉則藻茂而魚肥故以頌首莘尾爲得其性莊子曰在之也者恐天下之淫其性也故三章皆曰魚在在藻王在在鎬也且周之興也憂勤在豐其豈樂在鎬豈樂在鎬其嘉樂在洛故是詩正言樂豈蓋憂釋而爲樂怒釋而爲豈尙書大傳曰周書自泰誓就召誥而盛于洛誥傳曰士卒鳧藻言其和睦歡悅如鳧之戲於水藻也或言魚藻亦以其如此

海藻

爾雅曰蕒海藻如水藻而大似髮黑色生深海中陳藏器以爲爾雅所謂綸似綸組似組東海有之正爲二藻也善療瘤瘰夫頸處險而瘰今汝洛間多焉而浙右閩廣人鮮病之者按本草海藻昆布青苔紫菜療瘰瘤結氣被海之邦食此故能療之也

羅願爾雅翼 藻

藻水草也生水底橫陳於水若自澡濯然若流水之中隨波衍漾莖葉條暢尤爲可喜故采藻於行潦也有二種其一種葉如雞蘇莖大如箸長五六尺其一種莖大如釵股葉如蓬蒿謂之聚藻橫被水下有自然之文故古者象服有藻火之屬又畫於棹以爲飾亦以厭火魚藻之詩言萬物不得其性王居鎬京不能以自樂蓋察見淵魚者則魚無所逃有所自蔽蓋魚之潛於藻若鳥之集於林一章曰魚在在藻有頌其首魚樂而出游于藻之外也二章曰魚在在藻有莘其尾言魚樂而反戲於藻之內也三章曰魚在在藻依于其蒲樂既極而止于蒲蓋樂而不知反則樂有窮故有靜而止息之地則時出而樂有餘矣惟王亦然自豈樂出而飲酒自飲酒入而樂豈終而那就其居以休息皆若魚之得所矣今鳧鴈屬亦樂於藻故曰鳧藻楚辭曰鳧雁皆唼夫梁藻是也

鄭樵通志 昆蟲草木略

海藻類紫莢而粗惡曰落首曰薄曰石衣曰海蘿爾雅云蘆石衣郭氏云石髮也又曰蘆海藻郭氏云如亂髮其說無別致悞後人引據且薄與蘆藻與蘆皆無異義何得爲二物海藻形如敝衣石髮形如亂髮自是二物凡此之類易得混淆又有石帆之於水松亦能相亂故陶弘景云石帆如柏療石淋水松如松療漢毒吳都賦所謂石帆水松是也又有海帶似帶昆布似布爾雅云綸似綸組似組東海有之綸卽鹿角菜組卽海中苔

王圻三才圖會 海藻

海藻生東海池澤今出登萊諸州有二種一種葉如雞蘇莖如箸長四五尺一種莖如釵股葉如蓬蒿謂之聚藻今爲海藻者乃是海中所生根著水底石上黑色如亂髮而相葉類水藻而大謂之大葉藻本經云主癭瘤是也按本經海藻一名薄而爾雅謂薄爲石衣又謂薄一名水若一名石髮石髮卽陟釐也味苦寒無毒治宿食不消五膈痰壅水氣浮腫脚氣黃鈍氣

徐光啟農政全書 菹草考

卽水藻也生陂塘及水泊中莖如籬線長三四尺葉形似柳葉面狹長故名柳葉菹又有葉似蓬子葉者根籬如釵股而色白味微鹹性微寒

救饑

撈取葉連嫩根揀擇洗淘潔淨剉碎燂熟油鹽調食或加少米煮粥食尤佳

水豆兒考

一名葳菜生陂塘水澤中其莖葉比菹草又細狀類細線連綿不絕根如釵股而色白根下有豆如退皮菹豆瓣味甘

救饑

採秧及根豆擇洗潔淨煮食生醃食亦可

本草綱目 水藻釋名

李時珍曰藻乃水草之有文者潔淨如澡浴故謂之藻

集解

蘇頌曰藻生水中處處有之周南詩云于以采藻于沼于沚于彼行潦是也陸璣註云藻生水底有二種葉如雞蘇一種莖如筋長四五尺一種葉如蓬蒿莖如釵股謂之聚藻二藻皆可食煮熟按去腥氣米麪糲蒸爲茹甚滑美荆揚人饑荒以當穀食

陳藏器曰馬藻生水中如馬齒相連

李時珍曰藻有二種水中甚多水藻葉長二三寸兩兩對生卽馬藻也聚藻葉細如絲及魚鰓狀節節連生卽水蘊也俗名鰓草又名牛尾蘊是矣爾雅云蒼牛藻也郭璞注云細葉蓬茸如絲可愛一節長數寸長者二三十節卽蘊也二皆可食入藥以馬藻爲勝左傳云蘋蘩蕰藻之菜卽此

氣味

甘大寒滑無毒

主治

陳藏器曰去暴熱熱利止渴擣汁服之小兒赤白遊癰火焮熱瘡擣爛封之

發明

孫思邈曰凡天下極冷無過藻菜但有患熱毒腫并丹毒者取渠中藻菜切搗傅之厚三分乾卽易

其效無比

海藻集解

別錄曰海藻生東海池澤七月七日采暴乾

陶弘景曰生海島中黑色如亂髮而大少許葉大

都似藻葉

陳藏器曰此有二種馬尾藻生淺水如短馬尾細黑色用之當浸去鹹味大葉藻生

深海中新羅國葉如水藻而大海人以繩繫腰沒水取之五月以後有大魚傷人不可取也爾雅云
綸似綸組似組東海有之正謂二藻也 蘇頌曰此卽水藻生於海中者今登萊諸州有之陶隱

居引爾雅綸組註昆布謂昆布似組青苔紫菜似綸而陳藏器以綸組爲二藻陶說似近之 李

時珍曰海藻近海諸地采取亦作海菜乃立名目實之四方云

修治

雷斅曰凡使須用生烏豆并紫背天葵三件同蒸伏時日乾用

李時珍曰近人但洗淨鹹味焙

乾用

氣味

苦鹹寒無毒

甄權曰鹹小毒

徐之才曰反甘草

李時珍曰按東垣李氏治療癰馬刀

散腫潰堅湯海藻甘草兩用之蓋以堅積之病非平和之藥所能取捷必令反奪以成其功也

主治

本經云癭瘤結氣散頸下硬核痛癰腫癰疽堅氣腹中上下雷鳴下十二水腫

別錄曰療皮間

積聚暴瘡瘤氣結熱利小便

甄權曰辟百邪鬼魅治氣急心下滿疝氣下墜疼痛卵腫去腹中

幽幽作聲

李珣曰治奔豚氣腳氣水氣浮腫宿食不消五膈痰壅

發明

張元素曰海藻氣味俱厚純陰沈也治癭瘤馬刀諸瘡堅而不潰者經云鹹能軟堅營氣不從外爲浮腫隨各引經藥治之腫無不消

成無己曰鹹味涌泄故海藻之鹹以泄水氣也

孟詵曰

海藻起男子陰消男子瘡疾宜常食之南方人多食北方人效之倍生諸疾更不宜矣

李時珍

曰海藻鹹能潤下寒能洩熱引水故能消癭瘤結核陰瘻之堅聚而除浮腫腳氣留飲痰氣之濕熱使邪氣自小便出也

附方

海藻酒治瘰氣用海藻一斤絹袋盛之以清酒二升浸之春夏二日秋冬三日每服兩合日三酒盡

再作其滓曝乾爲末每服方寸匕日三服不過兩劑卽瘥

范注

瘰氣初起海藻一兩黃連二兩

爲末時時舐噉先斷一切厚味

丹溪方

項下瘰癧如梅李狀宜連服前方海藻酒消之

肘后方

蛇盤瘰癧頭項交接者海藻菜以蕎麥炒過白殭蠶炒等分爲末以白梅泡湯和丸梧子大每服六

十丸米飲下必泄出毒氣

范氏得效方

藻部藝文一

水藻賦

唐郭元超

遊子行邁登晉山之孤嶽翠谿晶以淪漣紅嶂赫兮斑駁爾其雲崖委溜風壑鳴泉苔彬彪以冒石藻漫莽兮盈川予以采藻于彼行潦沼沚之毛汙潭之草霍霍靡靡汎汎悠悠乍黃緣於春水或霏歷於春洲觀其往往縈散離離無畔嫵媚島嶼睥睨江漢碎流月於澄波隱孤雲於斷岸生不擇所長亦無叢不資潤於微露不懼威於勁風纖莖瑾瑾密葉茸茸宿銀塘之白鷺矯清水之文虹則知

乘流則遊遇坻則植柔而能全弱而能直其爲隱也不居高而處卑其爲謙也常韜光而晦色嗟茂族之無託願貞芳之見移生君之銅沼汎君之瑤池雜青蓮與翠荇偶杜若與江離生於水兮人不知歲歲年年幽澗垂

藻軒解

明李東陽

青華主人建閭南輿高居江渺構材爲亭瑩石爲沼層瀾碧皺衆卉雲繞顯芳漱潔名之曰藻客有過者難之曰萬彙聚茁羣植並分鉅者爲梗櫟秀者爲篁筠堅者爲檜柏芬者爲蘭蓀山苞水葩莫可具陳彼藻之細何足以云主人曰君子設佩聖人取物匪名則嘉惟義斯擇品不必富類不必僻泥形爲迂執象爲惑子坐聽我言藻之德夫藻者氣孕天秀根含地靈內秉柔質外敷素英不雕而華匪替其馨順時生者爲孫命與物徙者爲和光靈負潔以自濯亦何心於行藏客曰可得聞邪主人曰窮海之裔荒溪之涯舟楫之所不至人跡之所不加以汗漫爲方以波濤爲家雖溷跡於草莽靈委情於泥沙客曰嫩哉善藏其用子旣出矣請言乎動主人曰或載衣襟或登簞簞滌以甘泉薦以方簋陋末跡於芻蕘恥遺瑕於葑菲繪形則與火齊光比德則與鑑爲軌功雖著而不知其勞用

非奢而莫闕其美客曰噫哉君子之斐主人曰嘻物貴實用禮戒彌文弗玩其華而采其根楚佩江
蓴周歌澗繫桃李薇蕨維萬與蘋匏瓜行葦列國所陳繫藻之德於吾則均朝爾吾居夕爾吾羣匪
藻吾軒亦藻吾身下雪民隱上華國勳惟夙夜是存以無負於吾軒客起再拜斂容棘吻君門巍巍
矚者莫瞬君行濯濯暇莫可措包荒納汙辭不我擯鄙人何知敢謝不敏主人不答莞爾而哂

藻部藝文二 詩

贈從弟

魏劉楨

汎汎東流水磷磷水中石蘋藻生其涯華葉紛擾溺采之薦宗廟可以羞嘉客豈無園中葵懿此出
深澤

藻部選句

漢司馬相如上林賦唼喋菁藻

宋王炎石菖蒲賦有荷有藻產漣漪兮可薦可羞播聲詩兮

晉嵇康詩俯唼綠藻託身洪流

唐杜甫詩獻芹則小小薦藻明區區 又 北風起寒文弱藻舒翠

縷 張籍詩藻密行舟澀

白居易詩翠藻蔓長孔雀尾 又 綠藻潭中繫釣舟 金吳澈詩